

# MY BIBLE FIRST

PRIMARY YEAR A  
Q 3 #31

## A Etlawm Pasian' Biakbuk

### SUNDAY

**1** Tukul sungin a etlawm Pasian' biakbuk ah i va hawhna i man zo tading hi. Nungkal a i muhte na phawk lai hiam? Kidalna puankang, lutna kongpi-a a hoih mahmah puankhai, nisim a biakna tau tungah kipia tuute, leh mite'n ngak-in thu a ngetna biakinn huang sung cihte ahi hi.

Tuni in biakna tau leh biakbuk lutna kongpi kikal a om, biakna tau banga a taang, sik tawh a kibawl kuangpi thu i sin ding hi. Tua sungah tui adim-in om hi. I lam-makaipa in tua pen tuikoihna kuangpi ci hi. Siampite in biakbuk sung nasepna khatpeuh hih nading-ah kisiansuah ding uh hi. Tua man in amaute in biakna tau tungah biakpiakna a hal ma, leh biakinn sung a lut ma un a khedapte suah-in, tuikoihna kuangpi ah a khut, a khete uh sil masa den uh hi.

Tuikuangpi pen numei tampite in biakinn lam nadinga a piak uh limlangte tawh kibawl ahi hi. Itsik


### KAMNGAH

Amaute in, "TOPA inn ah pai ni," a hong cih ciangin ka nuam hi. Late 122, 1, ZSV. *I was glad when they said to me, 'Let us go into the house of the Lord.'*" Psalm 122:1

lo-a a piakkhiatna un Pasian' biakinn hoihsak mahmah hi.

Huang-umna daai akang panin kongkhak khat bek aom bangin biakinn sung lutna kong khat bek om hi.

Biakinn huang lutna dan mahin biakbuk lutna ah zong adum, puansan, adupsan melpua puankhai na om hi. Kongkhak khat leh kongkhak puankhaite in mawh-maisakna ngah a, itna tawh vantung Pa kiang i zuatkik nadingin lampi khat bek om hi, cih hong phawksak hi. Tua pen Jesuh' nuntakna leh sihna in eite aa ding ahih na i upna pan ahi hi. **John 10:7, 9; 14:6.**

 **NGAIHSUN-IN:** *Pasian in Amah i biak ding ciangin i pumpi, i lungsim, leh i puansilhte a siangtho ding adeih hiam? A nidanga-te tawh kibang thute mah Sabbath ni-in na ngaihsun hiam? Pasian in eite hong it mahmah a, Satan' thang pan i suahtak nangin Jesu Kongpi hong hih manin na lung adam hiam?*

### MONDAY


**2** Tuni in eite in biakbuk sunga van thupite i en ding hi. Siampite bek a sungah lut thei ahih main, i makaipa hong gen bang i ngai ding hi.

Ama hong gente i up ding haksa ding hi. Inndeitung teng meitang in phe lelep hi. A gimnam tuampian hi. Kawmte le sabuaite in mei lehtaankik hi.

Banghang hiam? Kawmte leh sabuai cihte in a siangtho, kham tawh a kizut man ahi hi.

I makaipa in tua lai-ah inndeinih om hi, ci hi. Dei masa in Siangthona Mun kici-a, a nihna in Siangthopen Mun kici hi. Tuateneih in i muh khitsa puankhai nihte sanga hoihzaw kidalna puankhai tawh a kikhen hi.

Inndeina puankhai pen a tungdong paito lo a, siampite in siangtho pen inndeinih sunga meitaangkhaia pen mu thei uh hi.



© Sean Eichelberger



© Sean Eichelberger

I makaipa in tua pen Pasion ompihna pan hong pai hi, ci hi. Khat veivei tua pen taang lua mahmah ahih manin siampite inndeis sung pan kihem khia uh hi.

Biakbuk sungah kongvangneu omlo hi. Inndeis lutsuk veilam ah ahoih mahmah kham meivak omte in biakbuk sung khempeuh taangsak hi.

Meivak tau in hiang sagih a nei hi. Ahiang khat sim in sathau kuangkumno leh meivak khau a nei uh hi. Siampite in meivakkhau puahin, sathau adip ciangun, amaute in meivakte hun khat sungin mit cih om ngei lo hi. Tua manin meivakte pen sun le zan in akuang den ahi hi.


Meivak in Jesu leitung khuavak cih phawk sak hi.

**John 8:12.** Pasion ihmu ngeilo a, eite hong encikden hi. Sathau in Kha Sian-



© Sean Eichelberger

gtho tawh kibanga, khentatna maan hong neisak in, Thupiak Sawmte hong zuisak hi. Eite in tua bangin i nuntak ciangin Jesu ading khuavak taangkhiate ihi hi.

 **NGAIHSUN-IN:** Biakinn ah i pai ciangin tua lai ah atuam-in Pasion a om hiam? Eite i koici om ding hiam? Omdan ding nam thum gen in.

## TUESDAY

**3** Biakbuk hawhsinna ah, i makaipa in biakbuk dei masa thu hong gen khin a, tua pen Siangtho Mun kici hi. Kham meivakte veilam ah a om hi. Inndeis taklam ah, kham sabuai khat a om hi. Sabuai tungah a siangtho moh kician'na nih om hi. Tua nihte tungah moh guk tuak kikoih sitset a, moh khat ciangin Israel minam khat ta ahi hi. Tua mohte tung pan a namtui mahmah gimnamte kizeel hi.

I makaipa in hong genna ah, Sabbath nisim-in moh ki-em thakte hong kikoih den hi. A lui a kilakhiate pen siampite kipia hi.

Moh thu i lungngaih ciangin, Jesu in nuntakna anlum cih i phawk hi. **John 6:35.** Ama kammal Lai Siangtho sunga Ama thu i sin ciangin Ama' anlum (moh) a ne ihi hi. I nisim nek ding an hong piak zong i phawk hi. Kha-an leh taksa an nisim in i kisam den hi.


A ban-ah, kham paknamtui halna



© Sean Eichelberger

tau pen Siangtho Mun leh Siangthopen Mun kidalna puankhai mai ah om cih thu i makaipa in hong gen hi. Pasion mahmah in tua tau tungah mei hong tawhsak hi, ci hi. Siampite in biakbuk sungah paknamtui hal nadingin tua a siangtho mei zangsuak den uh hi.

Zingsang le nitak sim in, biakinn tual ah gangawh biakpiakna leh, mite in thungen in mawh a thum hun sungin siampipa in paknamtui halna tau tunga a siangtho mei tawh meihol hal-in gim namtui biakpiakna pia den hi. Amah in tua bangin asep sungin, Pasion ompihna khuavak tangpha bangin a taan'na Siangthopen Mun mitsuan hi. Huih lak ah gimnamtui kizeel a, a pua lam-a om mite za thei uh hi. Banghang hiam cihleh amaute in Jesu um in, Pasion in amau' tangin Jesuh' kicinna mu ahih lam thei uh hi. Pasion in amau thungetnate a za hi.

 **NGAIHSUN-IN:** Na sin Lai Siangtho tangthute leh kamgahte in Jesu' kammal "nekna" ahi hi. Tuat in nang hong tha khausak ding hi. Amah in nisim in nang hong hopih nuam hi. Eite in i thunget a tawpna ah, "Jesu min suangin kong ngen hi, Amen," i cih ciangin Jesu in eite ading hong sepsak khin hi, cih upna a nei ihi hi; tua ban-ah, tua bangin i hih ciangin Pasion in i thungetnate hong za ding hi, cih i thei hi.

## WEDNESDAY

**4** I makaipa mahmah in zong tua a Siangthopen Mun sung mu ngei lo hi, ci hi. Tua mun in a siangthopen leh a thupipen mun ahi hi. Siampi lianpa bek tua mun ah kum khat in khatvei ta bek, Siansuahna Ni in lut thei hi.

Siangthopen Mun ah singkuang khat bek om a, tua in a siangtho kham singkuang ahi hi. Kham singkuang sungah suangpeek nih om hi. Tua tungah bang kigelh in, kua'n gelh a, koi bangin kigelh hiam cih na phawk lai hiam? Tua in Satan' muhdah penpen Thupiak Sawmte ahi hi. Nadangte sangin, Satan in susia nuam zaw a, a mangngilhchip dingin eite hong deihi hi.

Makaipa in, singkuang in ahoih mahmah sing tawh kibawl hi-a, asung leh apua kham tawh kituam hi, ci hi. A sin pen kham taktak hi a, hehpihna tokhom kici hi. Tua hehpihna tokhom a mongtuak ah ahoih mahmah kham tawh kibawl(khuat) vantungmi adiing hi. Tua vantungmi nih in zahtakna tawh singkuang ensuk uh hi. Vantungmi nih kikal-ah khuavak meitaang in Pasion' ompihna hong lak hi.

Hehpihna tokhom in alian Pasion' itna, leh hehpihna hong phawksak hi. Hih in a lamdang Pasion' geelna



© Sean Eichelberger





© Sean Eichelberger



hikei leh, Jesuh tawh a nungta tawntung dinga a lamden i om hiam? Om lo hi. Eite lak ah kuamah om lo hi. Eite i vek in Pasian' thukham i palsat hi. Ahi zongin Pasian' geelna hangin, mi khat sim in Satan le sihna, ahihkeh Jesuh le nuntakna khat zawzaw a teel thei hi.

**NGAIHSUN- IN:** Eite in Thupiak Sawmte neikei lehang, mawhna bang hiam cih i thei ding

hiam? Theilo e. **Rom. 7:7** sim in. Satan in mawhna acih banghiam cih eite' tel ding adeih hiam? Banghang deihlo ding! Thukham in mawhna hong thehsak manin, Thukham Sawm i zuih ding thu Satan in thei hi. Tua ban-ah, Jesu' huhna lo tawh eite in zui zolo ding cih zong thei hi. Satan in Pasian' geelna i theih ding deihlo hi. Tua in i leitungah Jesu' nunzia i etteh dan ding hong lak hi. Tua in eite hong huh ding Ama hatna hong gen hi. Tua in i khialh ciangin i thum theih nanging mawhna thaman a piak khitzia hong hilh hi. Eite ading in Jesu in hong sepsaksa leh hong sepsaknate hangin na lung adam diam?

## THURSDAY

**5** Siampi i makaipa in inntung dalna pen puannel kigan tawh kibawl ci hi. Tua pen daai-umna puankangpi dan hilo in, vantungmi meilom tawh kibang hi. Amaute in hoihtak-in puan a gattawm uh ahi hi. Tua innde i nihte sungah vantungmite om ding, cih i thei hi, ahi zongin amaute i mu thei kei hi. Amaute in Pasian' itna tawlna loin phat den uh hi.

“Inn tungkhum bang tawh kibawl hiam?” cih i dong hi. I lamlakpa in tua biakinn tungkhum pen a kibanglo puan thuap li tawh kilam hi, hong ci hi.

Innkhum puannel tungah keel' mul tawh kibawl puanzapi kiphah a, tua tungah tuu-tal vun tawh kibawl khat kikhuhsuk hi. Tua teng tungah guahmal kia adal dingin saham-vun tawh kibawl puandal khuh uh hi.

Tua khit ciangin “Siampite' puan leh nang a a kilamdang hiam?” ci-in lamlakpa i dong hi. Amah in hong gen hi, tua pen nak hoih mahmah hi. Tua puantualkang tungah, amah in puan adum khat silh hi. A liangko tungah kikhaite pen awmsuan kici hi. Tua tungah suang manpha sawm-le-nihte khat sim in Israel

minam khat ta ahi hi. **Paikhiatna 28:21.** Tua awmsuan in eite Pasian' lungtang leh lungsim sungah i om den a, Ama' adingin mi manpha i hihna hong phawksak hi, ci hi. Bangzah in phawkna hoih hiam!

A pualam ah i paikik ciangin, i lamlakpa in hih biakbuk lamna khat guk sawt hi, ci hi. Hahkat lua uh!

**NGAIHSUN- IN:** Biakbuk sunga na khempeuh in, Jesu leh eite honkhiat nading geelna vive gen hilo hiam? Biakbuk in Pasian leh Ama' lam-dang itna i telzawknangin ahong huh hiam?



© Sean Eichelberger

## FRIDAY

**6** Biakbuk i hawhna ah a thu bangzah na phawk lai hiam?


Biakbuk kimteng-ah bang om hiam? Bang melpuak hi a, bang tawh kibawl hiam? A sungah om ding hi lecin, a tungah bangteng na mu thei diam?

Kidalna puankhai avek-in bangzah om hiam? Bang melpuak-teng hiding hiam? Melpuak tuamtumte a khiatna bang cih na phawk lai hiam?

Biakbuk huang lutna na pai ciang bang musakpen na hiam? Tua mun ah, nisim in nihvei ta bang thu piang hiam? Bang a cihnopna hiam? Adang biakpiaknate tua tau tungah a kipia mah hiam?

Biakbuk sung adei masa pen bang kici hiam? Tua lai ah bangteng om hiam? Khat sim i a khiatnate na gen thei diam?

Innde i nihna min bang kici hiam? Tua tak ah bang om hiam? Tua pen bang tawh kibang hiam? Tua sungah a lut thei khat bek pen kua hiam? A puantual ahihkeh a puansilhte bangci dan hi a, adang siampite tawh a kilamdang hiam? Biakbuk in kua thu leh bang hong hilh hiam? Na va hawhna ah nuam nasa hiam?



Interesting and beautifully illustrated book for children on the sanctuary.

1-877-242-5317  
mybiblefirst.org

**FURTHER STUDY:** Exodus 25–27; 30; 31; 35; 36; 39:32–40; *Patriarchs and Prophets*, pp. 343–358; *The Story of Redemption*, pp. 151–157; *The Bible Story*, vol. 2, pp. 177–187.



## THE STORY CORNER

# Lamlak-meivak Inncingpa - Khen 2

Adapted from *Scrapbook Stories* by Amy Sherrard

**M**ary in apam-a suangtum golte' nungah migilo, misusia-theite kibu a om ahih lam a thei kha kei hi. Amaute in Mary' pa a pusuahkhia amuh uh ciangin, tua mei-inn ah numeino guak bek om cih a thei uh hi. Tua leh, tembaw hawlte in a lauhuai suangtum golte a muh theih nangun meivak a kivak hun ma in, tua migilote in Mary' pa thakhat-in kepcip ding ageel uh hi.

Tua zan-in tembaw pawlkhat vanhoih tampi pua in hong kantan ding uh ahi hi. Migilote in lamlak-meivak a taan' kei leh huihpi lakah tembaw suang tawh kitaih in a kisiat ding lamengkhol uh hi. Tua khit ciangin amaute taisuk gawp in tua tembawsia panin na khempeuh gu dinga, tembaw nasemte' sih ding leh aliam dinguh awlmawh lo uh hi.

Khua sung paina ah Mary' pa in lawh sungah vanteng adimkhit ciang in mei-inn lam hong kileh-kikta hi. A sawtlo a mei vak hun ta ding cih amah'n thei hi. Lamka a tun nai ciangin, migilo-te in a kibukna uh panin hong delh uh hi. Amaute in leitang tungah amah lawnsuk uh a, manlang takin khau tawh akhut leh akhete a hencipsak uh hi. Tua ciangin amaute in a buk sungah tuah uh a, tua lai ah amah guak zingsang dong nusia uh hi. Amah in a khahkik nangun a thuum hangin amaute in nuihsan lel uh hi. Pasal nih amah tawh aom sungin adangte tuipei gei lam ah ataikhia kik uh hi.

"Oh, a ithuai Mary! Nang bang nahih tam maw?" ci in buk sungah lumkawm in a pa a kap hi. "Meivak taangsak dingin tua lai-ah kuamah om lo hi. Tembaw tampi kisia thei dinga, tembaw nasem mi tampi mangthang thei ding hi."

Mei-inn sungah, khua a mial sem ciangin, Mary zong amah kia lau semsem hi. A pa koi ah om? Tembawte leh, a genthei nasemte e leh? Amah in sinnopna tawh meivak ka tangsak thei kha diam, ci hi. Ahi

zongin ama bat theih dingin tuate sanglua mahmah hi. Ahi zongin, amah in meigit pawlkhat ngah a, meikhuat omna ah sabuai khat akaital hi. Sabuai tungah amah kahto a, abat theih dingin a khedawn tawh asang theitheih in hih himah leh meivaak khaute aban thei nai tuan kei hi.

Ciangtawn khat a nei hi leng, "meigittang khau tawh ka hen dinga, tua tawh meivak ding hiveng," a ci hi. Ahi zongin ciangtawn khat zong a mu kei hi.

A pualam ah, huihpi hong suksia semsem hi. Huih leh tuihualte in a lauhuai suangte a vatgawpna a gingte Mary in a za hi. Tembaw nasemte in lung-himawh tak-in tuipei gei pan, mei taan ding ngak gige uh hi. Amaute in lampi manlo tawh a tembawte uh hong hawl phei uh diam? Migilote in lungduai hetlo kawm in tembaw in suangte

aphutkhak ding a ngak gige uh hi.

Buk sung panin, Mary' pa in khuazing lak-a mei-inn a om a tanuno Pasian in a kepsak nading, leh lampi khat peuhpeuh tawh tembawte in suangte a phut khak loh nadingin thu a ngen hi. (Zop Lai Ding)



**Additional resources:** nature lessons, activities, music, Bible lessons, Scripture memory, and more.

**My Bible First** Copyright © 2015

**Phone:** 1-877-242-5317

**Web:** [www.mybiblefirst.org](http://www.mybiblefirst.org) • **E-mail:** [sales@mybiblefirst.org](mailto:sales@mybiblefirst.org)

*Unless otherwise noted, Scripture quotations are from the NKJV.*